

海

佢分全世界黏共下，
佢係偉大的創作者，
生命的源頭。

佢，
係開心，
係悲傷，
係一面鏡仔。
看起來像冰，
像冷風，
毋過 心是溫暖个。

當遽 當遽，
一座座花喇必駁个島 當遽在海項出世咧。
毋係板塊在搞怪，
係大海个藍衫 鉤到人類个垃圾，
佢一轉身，
就撈垃圾捲共下咧。

這條屋，
所有生命个屋。
如今，
滿哪仔烏色个污染物，
色目打眼个毒素，
最尾，
佢毋會再開心，
乜毋會過傷心，
就單淨伸到一片孤栖，
照影出無家好轉个艱苦。